

Tutu ña ni ke'i Santiago

Ti'vi' ra cha'an'

1 ¹Yu'u nduu' Santiago, te xika' nuu' nuu' Ndiosí xiin' nuu' xto'o e' Jesucristo. Ti'vi' i cha'an' ndo'ó ne uxí uvi ti'vi', ne ta'an' i, ne Israel, ne ni kiku ki'in' xaan' iin yivi'.

Na nakuatia' nimá e' kii' yoo tundo'o' nuu' e'

²Ñani ta'an' i, na nakuatia' va nimá ndo' kii' ndo'o' ndo' nuu' ndee ka tundo'o'. ³Kuachi ndii xa xini ndo' ña kii' ndo'o' ndo' nuu' ndee ka ña'a xa'a' a ña ini ndo' xini ndo' Ndiosí ndii, chindiee' a te ita' ni'i ka ndo' nuu' ña ini ndo' jaan'. ⁴Te naa' ita' ni'i ndo' nuu' ña ini ndo' jaan', te chindiee' a ndo'ó nuu' tundo'o' ndee so'o' ndi'i', te kunduú xachi' ndo' ne xata'an nuu' Ndiosí, te kunduú tu ndo' ne xinu xachi' nuu' a, te köo' ña kuni xachi' ka nuu' ndo'.

Kakan e' ña chuun va e' ña kaka ndaku e' nuu' Ndiosí

⁵Te naa' yoo sava ndo'ó, ne kuni ka ña xini tuni nuu' ndii, kakan ndo' a nuu' Ndiosí, te taxí a ña jaan' nda'a' ndo'. Sakan' ña Ndiosí ndii, taxi' a kua'a' ña va'a nuu' e', te xi'é a nuu' e' xa'a' a ña xikán e' ña jaan' nuu' a. ⁶Ndisu ini ndo' te kakan ndo' a, te kunduú ndo' ne uvi a xanini, sakan' ña ne uvi a xanini ndii, nduu' nia ndee na tikui mini ka'nu', te' kua'an kuaxi xika' xaa' tachi', te yo'o' ni jaan' koyo' a ra'. ⁷Kuachi ndii, ne xaa' ña jaan' ndii, na kani ni nia ña natiin nia iin ña xikán nia jaan' nuu' xto'o e'. ⁸Sakan' ña ne uvi nimá nduu' nia, te ximi' koq tu ini nia nuu' sakuu' ña xaa' nia.

⁹Ñani ta'an' e', ne nda'vi kuu' ndii, na va'a kuni nia ña nduu' nia ne ka'nu' nuu' Ndiosí. ¹⁰Ndisu ne vika' ndii, na

va'a kuni nia ña nduu' nia ne nda'vi kuu' nimá ni xaa Ndiosí, sakan' ña ña vika' nia jaan' ndii, ndoñu'u' a ndee naa ita ku'u. ¹¹Kuachí ndii, kii' keta ñu'u sanandii' ndiee' a ndii, ichi ku'u jaan', te koyo ita a, te ndoñu'u' ña ndatun' a. Iin kachi kundo'o tu ne vika', sakan' ña ndoñu'u' ne jaan', te ndoñu'u' tu ña xachuun' nia xiin' ña vika' jaan'.

Kuäsa' xito' kua'a Ndiosí ne yivi'

¹²Sañu'u' va Ndiosí yoo ka xandieni nuu' ña xamaña, sakan' ña kii' kanando nia nuu' ña jaan' ndii, natiin nia kivi' ñuu ña köo' kivi' ndi'i', ña nduu' ndee naa corona ña ni'í' ne kanando, ña ni taxí Ndiosí kuento a xa'a' nuu' ne ndani ña'a'.

¹³Na ka'an yoo ka kii' xito' kua'a ña'a' ña kini ndii: "Ndiosí ni xito kua'a yu'u." Kuachí ndii köo' ndiee' ndee iin ña'a te sanama' a Ndiosí nuu' kuachí, te ni ndee mii' Ndiosí xito' kua'a ndee iin ne yivi' te koyo nia nuu' kuachí. ¹⁴Süu' jaan' ndii ña kini, ña ndioo' ini mii' nia, nduu' ña xito' kua'a ña'a', te xiku'un nia nuu' kuachí. ¹⁵Te xa'a' a ña kini ndioo' ini nia ndii, xaa' nia kuachí. Te kii' xaa' te xaa' nia kuachí jaan' ndii, kivi xachi' nia nuu' Ndiosí xa'a' a jaan'.

¹⁶Ne kua'a ñani ta'an' i, küni xa'an' xiin' mii' ndo'. ¹⁷Kuachí ndii Ndiosí taxi' sakuu' ña va'a, te sakuu' ña ndoo kuaxi mii' ndu'u' a ndivi', te suvi tu a nduu' ña ni xa'a sakuu' ña yi'é ndiee' ndivi'. Te Ndiosí ndii, köo' kivi' namá a ndee naa xaa' ña yi'é ndiee' ndivi' jaan', ni ndee nämá tu a ndee naa xaa' kunda'vi ña jaan'. ¹⁸Te xa'a' a ña kuni mii' a, ni satuví a yoo' xiin' tu'un a, ña ndixa, te kundu'u e' si'e a, ne nuu' nuu' sakuu' ña ni xa'a a.

Na kuni so'o e' tu'un Ndiosí, te saa tu e' ña ka'an a

¹⁹Ne kua'a, ñani ta'an' i, xa'a' a jaan' na kuni a ña koo tu'va sakuu' e' te kuni so'o e' ña ka'an inga ne yivi', te ndiatu' e' xiin' ña ka'an e', te nasa'a' yachi tu e'. ²⁰Kuachí ndii, ña kui'e ne yivi' ndii, taxi' a sachuun' ndaku nia saa kuni Ndiosí. ²¹Ña jaan' na kiii' nakoo ndo' sakuu' ña xe'na', xiin' sakuu' ña nia'a ña yoo va nuu' kivi' ñuu ndo'. Te natiin maso ndo' tu'un ña ni chi'i Ndiosí nimá ndo', sakan' ña ña jaan' kumi' ndiee' te sakakú a ndo'o.

²²Ndisu küni xa'an' xiin' mii' ndo', süu' kuni so'o kuiti' ndo' tu'un jaan'. Süu' jaan' ndii, kuni a saa tu ndo' ña ka'an

a. ²³Kuach̄i ndii, ne xini so'o kūit̄i' tu'un jaan', te xaa' n̄a n̄a ka'an a ndii, nduu' n̄a ndee naa iin ne xito' ndiaa ndi'i nuu' n̄a nuu' yuu' peko. ²⁴Te kii' ndi'i koto ndiaa xiin' mii' n̄a, te kua'an n̄a ndii, iin kan̄i' va te nandos̄o' n̄a saa kaa' nuu' n̄a. ²⁵Ndisu ne xini so'o tu'un ndei' Ndiosí, te xito' ndi'i n̄a n̄a ka'an a xiin' n̄a, te ndikún kixin' n̄a a, te nandos̄o' n̄a a ndii, sañu'u' n̄a'a Ndiosí, te xaa' n̄a a. Sakan' n̄a tu'un ndei' jaan' ndii, iin n̄a va'a ndi'i nduu' a, te sando' ndiká a yoo' nuu' kuach̄i e'.

²⁶Te naa' yoo ka tuu n̄a nduu' n̄a ne xaa' xna'a n̄a kuní Ndiosí, ndisu xito' n̄a saa koo yu'u' n̄a ndii, xini xa'an' xiin' mii' n̄a, te ndiaa ya'vi' n̄a xaa' n̄a jaan' nuu' a. ²⁷Sakan' n̄a n̄a ndoo xiin' n̄a ndaku nuu' yuva' e' Ndiosí, n̄a xtani a saa e' ndii, n̄a yo'o' nduu' a: n̄a koto e' ne kuach̄i' nda'vi, te sakan' tu n̄a'a kuaan' kii' ndo'o' n̄a, te koto xiin' mii' e' nuu' kuach̄i n̄a yoo iin yivi'.

Vä'a nakaxin e' ne yivi'

2 ¹Nani ta'an' i, xa'a' a n̄a ini e' xini e' xto'o e' Jesucristo, n̄a ka'nu' koo' chukuu' ndii, kuní a n̄a iin kachi tiin man̄i' e' ndee ka nuu' ne yivi'. ²Saa e' cuenta ndii, ndi'vi iin te vika' ni'nu' toto va'a, te ñu'u' tu iin kaxun nda'a' va'a nuu' nda'a' ra, mii' nakayá ndo', te ndi'vi tu iin te nda'vi kuu' ni'nu' toto yata' ikan'. ³Te koto'ni ndo' nuu' te vika' jaan', te ka'an ndo' xiin' ra ndii: “Nia'a yat̄in yo'o' kundu'u' un', tákui'e”, kach̄i ndo'. Te ka'an tu ndo' xiin' te nda'vi kuu' jaan' ndii: “Ndee kaa' kuiin ndich̄i yo'ó, uun ñu'u' mii' ita' xa'a' i yo'o' kundu'u' un'”, kach̄i ndo' xiin' te jaan'. Naa' sakan' nduu' a ndii, ⁴xa iin kachi tiin man̄i' ndo' ne yivi' kii' xaa' ndo' sakan', te nduu' ndo' ndee naa te xa'nú kuach̄i, te xachuun' ndaku.

⁵Ne kua'a ñani ta'an' i, chuun xa'a' va ndo' n̄a ka'an i xiin' ndo' vitin: ¿Náa xini ndo' n̄a ni nakaxin Ndiosí ne nda'vi kuu' iin yivi' yo'o' te ini va n̄a kuní n̄a'a' n̄a? Te kii' xaa' n̄a sakan' ndii, ndee naa vika' n̄a nuu' a xa'a' a n̄a natiin' n̄a n̄a ka'ndia chuun' a nimá n̄a saa ni taxi a kuento a nuu' ne ndani n̄a'a'. ⁶Ndisu ndo'ó ndii, mii' kuu' ndo' xiin' ne nda'vi kuu' jaan'. ¿Saa tu xini ndo' n̄a ne vika' jaan' nduu' ne mii' kuu' xiin' ndo', te suvi tu n̄a nduu' ne tiin' kuach̄i siki' ndo'ó, te kua'an n̄a xiin' ndo' ndee vi'e mii' xa'nú te yivi' kuach̄i? ⁷¿Saa

tū xīnī ndo' ña suvī tū nīa nduu' ne kaniā'a xa'a' kivi' ndatun' xto'o e', ña inī e' xini e'?

⁸Ka'án tū'un ndei' ka'nu' ka mii' yoso' a nuu' tutu Ndiosí ndii: “Kundanī ndo' ne yivi' xiin' ndo' ndee naa ndani xiin' mii' mij' ndo.” Sakan' yoso' a. Naa' ndixa xña'a saxinú ndo' ña jaan' ndii, va'a xaa' ndo'. ⁹Ndisu na iin kachi tiin mani' ndo' ne yivi' ndii, xa ni xaa' ndo' kuachi xa'a' a ña ni xka'ndia ndoso' ndo' ña ka'án tū'un ndei' jaan', te xa ne ndiso' kuachi nduu' ndo' nuu' a. ¹⁰Kuachi ndii yoo ka saxinú sakuu' tū'un ndei' jaan', ndisu xka'ndiá ndoso' nīa iin yu'u' kuiti' a ndii, kumi' kuachi nīa nuu' Ndiosí xa'a' sakuu' a. ¹¹Kuachi ndii, suvī Ndiosí jaan' ni ka'an ndii: “Kūmi' un' musa un'.” Te suvī tū a ni ka'an ndii: “Kā'ni' un' ne yivi'”, ni kachi a. Ña jaan' na kuu' naa' ni kumi' ndo' musa ndo', ndisu ni xa'ni' ndo' iin ne yivi' ndii, xa kumi' kuachi ndo' nuu' Ndiosí xa'a' sakuu' tū'un ndei' a.

¹²Sakan' na kuu' ndo'ó ndii, ndatu'un' va'a ndo', te sachuun' va'a tū ndo', sakan' ña xini ndo' ña sana'má Ndiosí yoo' nuu' kuachi e' xiin' tū'un ndei' a, ña sandoó ndiká yoo' nuu' kuachi e'. ¹³Kuachi ndii kuvita xachi' inī Ndiosí xa'a' yoo ka kii' sana'má ña'a' a naa' ni kuvita inī nīa xa'a' ne yivi', sakan' ña ne ni kuvita inī xa'a' ne yivi' ndii, keta va'a nīa kii' sana'má ña'a' a.

**Kuní a sachuun' inga' ña inī e' xini e'
Ndiosí xiin' ña chindie' e' ne yivi'**

¹⁴Ñani ta'an' i, ne ka'án ña inī nīa xini nīa Ndiosí, te xaa' nīa ña va'a ndii, kuäsa' kuní xachi' ña ka'án nīa jaan', te kivi' kaku nīa nuu' kuachi xiin' ña ka'án kuiti' nīa ña inī nīa. ¹⁵Saa e' kuenta ndii, yoo iin ne xika' ichi' Ndiosí xiin' e', tiaa, uun ña'a' nduu' nīa, te kuní toto kui'nu nīa, te kuní tū ña kutiaku nīa, ¹⁶te ka'án iin ndo'ó xiin' ne jaan' ndii: “Ndiosí na ku'un xiin' un', na koo na toto un' xiin' ña tiaku un'”, kachi ndo', ndisu täxi ndo' ña kuní nuu' nīa ndii, koo' ndee iin ña va'a ni xaa' ndo' xa'a' ne jaan' na sakan'. ¹⁷Nii' sakan' nduu' tū a xiin' ne ka'án kuiti' ña inī nīa xini Ndiosí, te xaa' nīa ña va'a ndii, iin ña kuäsa' kuní nduu' ña inī nīa jaan'.

¹⁸Ndisu saa e' kuenta ndii, ka'an yoo ka ndii: “Yo'ó ndii, inī un' xini un' Ndiosí, te yu'u ndii, xaa' i ña va'a.” Kivi' nīa'a ndo' yu'u ña inī ndo' xini ndo' Ndiosí kii' koo' ña va'a xaa' ndo'.

Ndisu yu'u ndii, xiin' ña va'a ña xaa' i kuví nia'á i ndo'ó ña iní i xini i Ndiosí.

¹⁹ ¿Ñáá kandixa' ndo'ó ña yoo iin ndaa' kuití' Ndiosí? Va'a xaa' ndo'. Ndisu ndee ña ndiva'a kandixa' ña jaan', te yi'vi va ña'a' a. ²⁰ ¿Ne küu' kaxi' nduu' ndo'ó! Xa'a' a ña ka'an kuití' ndo' ña iní ndo' xini ndo' Ndiosí, te xaa' ndo' ña va'a ndii, iin ña kuäsa' kuní nduu' ña iní jaan'.

²¹ Xa xini ndo' ña Abraham, te xijí yata' e' ndii, ni ka'an Ndiosí ña te ndaku nimá nduu' ra nuu' a xa'a' a ña ni xaa ra kijí ni xika ra nasoko' ra si'e ra Isaac saa ni ka'an chuun' a xiin' ra.

²² Te koto ndo' saa ni xachuun' inga' ña iní ra xini ra Ndiosí xiin' ña ni xaa ra. Te xiin' ña ni xaa ra jaan' ni xinu ña iní ra jaan'.

²³ Xa'a' a jaan' na ni xinu ña yoso' nuu' tutu Ndiosí mii' ka'an a ndii: "Ni iní Abraham ni xini ra Ndiosí, te ni ka'an a ña te xachuun' ndaku nduu' ra nuu' a." Sakan' yoso' a. Te ni ka'an tu a ña te xini ta'an' xiin' a nduu' ra. ²⁴ Ña jaan' na kuii' xini e' ndii, süu' xa'a' a ña ka'an kuití' ne yivi' ña iní nia xini nia Ndiosí, te nduu' nia ne xachuun' ndaku nuu' a. Süu' jaan' ndii xa'a' a ña xaa' tu nia ña va'a nduu' nia ne xachuun' ndaku nuu' a.

²⁵ Te xa xini tu ndo' saa ni xka'ndia a xiin' Rahab, ña' ni xiko' xiin' mii' mii'. Ndee ña' jaan' ni ka'an Ndiosí ña ña' xachuun' ndaku nduu' a' nuu' a xa'a' a ña ni natijn va'a a' te Israel, te kuan koto maña ñuu a', te ni ti'vi' ña'a' a' inga ichi', te ni kaku ra.

²⁶ Sakan' na kuii' iin ñu'u' nde'i' kii' köo' ka nimá a ndii, xa ni xi'i' a, nii' sakan' tu yoo ña iní e' naa' köo' ña va'a xaa' e'.

Koto e' yu'u' e' kii' ndatu'un' e'

3 ¹ Ñani ta'an' i, na ndüku' kua'a' va ndo'ó ña kunduu ndo' ne sania'á, sakan' ña xini e' ndii, ndiee' ka nakan Ndiosí kuenta nuu' ndu'u, ne sania'á, te sakan' ne xini so'o' ña jaan'.

² Sakuu' e' ndii, ki'in' va ichi' xaa' e' ña vä'a. Ndisu naa' yoo iin ne yivi', ne köo' kivi' xaa' ña jaan' xiin' ña ka'an nia ndii, ne yivi' va'a xachi' nduu' nia, te kuví ndiko' ni'i' xiin' mii' tu nia nuu' kuachi'.

³ Ndee naa xaa' tu e' kii' chika'ni' e' kaa yu'u' kuei, te saa ri' ña kuní e' ndii, kuví ndiko' ni'i' e' ri', te ku'un ri' mii' ka kuní e'. ⁴ Koto tu ndo' saa xaa' tundo'o', tee' ndee na'nu' xava'a tun' jaan', te ndiee' va xika' tachi' ndii, xiin' iin tun' lulu kuití'

kuv̄i satuv̄i' te yivi' nu', te kua'an nu' m̄i' ka kuní ra. ⁵Sakan' tu xaa' yaa' e' ndii, iin ña lulu kuenta ñu'u' nde'i e' nduu' a, ndisu kumi' a ndiee' te ka'an ninu a xa'a' ña na'nu' ya'a. Te nduu' a ndee naa iin ñu'u' tilikin', ña kuv̄i ka'mi kua'a' xava'a xiki' na'nu'. ⁶Te sakan' tu yaa' e' ndii, ndee naa ñu'u' nduu' a. Te iin xaan' mii' ñu'u' chitu' vi' ña ñia'a nduu' tu a. Te iin tu'un' ñu'u' nde'i e', ña kuv̄i sativi' kanii' e', nduu' a, te ndee kii' tuv̄i e' xiin' ndee skachi' kuv̄i e' ndii, kuv̄i sativi' a yoo', sakan' ña ndee naa ñu'u', ña kuaxi vi'e ndiaya', nduu' a.

⁷Ndixa nduu' a ndii, chuun va ne yivi' samaso ñia sakuu' nuu' kiti' iku', naa kuu' ti' kumi' ta'an xa'a', xiin' saa, xiin' ti' kañuu' tixin, xiin' ti' ñu'u' m̄ini ka'nu'. ⁸Ndisu ndee iin e' kuv̄i samaso yaa' e'. Sakan' ña iin ña ñia'a nduu' a, te kuv̄i ndiko' ni'i' ña'a' e'. Te xiin' yaa' e' jaan' ka'an e' kuento xatu, ña satuxu'vi ne yivi'. ⁹Te xiin' yaa' e' jaan' tu xaka'nu' e' Ndiosí, yuva' e', te xiin' ña jaan' tu sanacha'an' e' ne yivi', ne ni xa'a' Ndiosí saa kuu' m̄i' a. ¹⁰Xiin' yu'u' e' ka'an va'a e' xa'a' ne yivi' te xiin' ña jaan' tu sanacha'an' ña'a' e'. Ñani ta'an' i, xata'an saa e' sakan'. ¹¹Sakan' ña iin xaan' mii' kiee' tikui ndii, kuv̄i kiee' tikui va'a xiin' tikui uva. ¹²Ñani ta'an' i, sakan' tu itun' higo ndii, kuv̄i kuun nduu' olivo nda'a' nu', ni ndee kuv̄i tu kuun nduu' higo nda'a' yo'o' uva, sakan' na kuu' ni ndee kuv̄i tu kiee' tikui va'a mii' kiee' tikui uva.

Yoo uv̄i nuu' ña xini tuní

¹³Naa ka'ni sava ndo'ó ne xini tuní ndii, na nia'a ndo' ña jaan' xiin' ña va'a ña xaa' ndo', xiin' ña maso kuu' ndo', ña taxi' ña xini tuní ndo' jaan'. ¹⁴Ndisu naa' ndasi' va nuu' ndo' xini ndo' ne yivi', te kuni nakuita tu ndo' xiin' ña ndii, koo' ndee iin xa'a' ña ka'an ninu ndo', te xini xa'an' ndo' xa'a' ña ndixa. ¹⁵Ña xini tuní ña kumi' ndo' jaan' ndii, süu' Ndiosí taxi' a, süu' jaan' ndii ña xini tuní, ña yoo iin yivi' kuiti' nduu' a, ña ni nata'vi' xini' ne yivi', ña taxi' ña ndiva'a. ¹⁶Kuach̄i ndii mii' yoo ne ndasi' nuu' xini ña ne yivi', te kuni nakuita tu ña xiin' inga ne yivi' ndii, ndiee' maní' ña, te xaa' ña sakuu' nuu' ña ña'a. ¹⁷Ndisu yoo', ne kumi' ña xini tuní ña taxi' Ndiosí jaan' ndii, xika' ndoo e' nuu' ichi' a, te sakan' tu ndiee' maní' e', te va'a nimá e' xini e' ne yivi', te nda'vi kuu' e' xiin' ne yivi', te kuvita ini e' xa'a' ne yivi', te sakan' tu xaa' e' kua'a' ña va'a,

te nākaxin tu e' ne yivi', te ndüu' tu e' ne uvi nimá. ¹⁸Sakan' ña ne nduku' ña ndiee' maní' ne yivi' ndii, xika' maní' ña iin yivi', te natiin ña ña xaa' ne yivi' ña kuní Ndiosí.

Na ndiöo' ini e' xa'a' ña'a ña yoo iin yivi'

4 ¹¿Ñáá xini ndo' mii' kuaxi tun kui'e xiin' ñu'u ña yoo tein ndo'? Suu ña kini ndioo' ini mii' ndo' jaan' sakaku' ña kunta'an' nimá ndo' xiin' ña va'a ña kuní a saa ndo'. ²Ndioo' ini ndo' xa'a' ña'a, te köo' a natiin' ndo'. Xa'ni' ndo' ne yivi', te kündieni ka ndo' ña ndasi' va nuu' ndo' xini ña'a' ndo', ndisu köo' a natiin' ndo'. Xa'a tu ndo' tun kui'e xiin' ñu'u, ndisu köo' ña'a natiin' ndo', sakan' ña xikán ndo' a nuu' Ndiosí. ³Te kii' xikán ndo' a nuu' a ndii, köo' a natiin' ndo' sakan' ña xikán va'a ndo' a saa kuní Ndiosí. Süu' jaan' ndii xikán ndo' a te kusiki' saka ndo' a mii' yoo ña si' nuu' ndo'.

⁴Ndo'ó, ne xa'ni' ndoso' Ndiosí ndee naa ne kumi' musa ndii, ¿ñáá xini ndo' ña ne xtani va saa ña nduu' kuenta iin yivi' ndii, nanduu' ña ne ni ta'an' va'a ka xiin' Ndiosí? Sakan' na kuii' yoo ka xtani saa ña nduu' kuenta iin yivi' ndii, ni ta'an' va'a ka ña xiin' Ndiosí. ⁵¿Ñáá xanini ndo' ña yoso' saka ña ka'an nuu' tutu Ndiosí ndii: “Kuiñu va Espiritu Ndiosí, ña ni taxí a naá nimá e', xini a yoo'”? Sakan' yoso' a. ⁶Ndisu chindiee' kua'a' ka Ndiosí yoo' naa yoso' a nuu' tutu a mii' ka'an a ndii: “Täxi Ndiosí ña keta va'a ne ñuñu', ndisu chindiee' a ne nda'vi kuu' nimá.” Sakan' yoso' a. ⁷Sakan' na kuii' taxí ndo' ña ka'ndia chuun' Ndiosí nuu' ndo', te täxi ndo' ña keta va'a ña ndiva'a xiin' ndo', te kuxioo a nuu' ndo'. ⁸Ndasayatın ndo' nimá ndo' nuu' Ndiosí te kuyatın tu a jaan' nuu' ndo'. Ndo'ó, ne ndiso' kuachi ndii, nakoo ndo' a, te ndundo nimá ndo', sakan' ña ne uvi nimá nduu' ndo'. ⁹Xa'a' a jaan' na na kusuchi' u'vi ini ndo', te kuaku ndo', te tana ndii va ndo' xa'a' kuachi ndo'. Na nanduu ña ni xaku ndo' ña kuaku u'vi ndo', te ña si' ni xini ndo' ndii, na nanduu a ña kusuchi' va ini ndo'. ¹⁰Na sanuu' xiin' mii' mii' ndo' nuu' xto'o e' Ndiosí, te ki'in ka'nu' a ndo'ó.

Nätava' e' kuenta kuu' ta'an' e'

¹¹Ñani ta'an' i, kania'a xiin' ta'an' ndo'. Sakan' ña naa' kania'a ndo' xa'a' ne yivi', uun naa' natava' ndo' kuenta

kuu' ne jaan' ndii, kani'a'a tu ndo' xa'a' tu'un ndei' Ndiosí, te natava' tu ndo' kuenta kuu' tu'un ndei' a jaan'. Te kii' xaa' ndo' sakan' ndii, süu' te saxinú tu'un ndei' jaan' nduu' ndo', süu' jaan' ndii te xa'nú kuachi sananduu' xiin' mii' ndo'. ¹²Kuachi ndii Ndiosí kuiti' nduu' ña xa'a tu'un ndei' jaan', te suvi tu a nduu' ña xa'nú kuachi e'. Te ña jaan' kumi' ña ndiee' te sakakú a yoo' nuu' kuachi e', uun katun' a yoo'. Ndisu ndo' ndii, ¿yoo nduu' ndo', tuu ndo', na natava' ndo' kuenta kuu' inga ne yivi'?

Vä'a ka'an ñuñu' e' xa'a' kivi' tiaan

¹³Chuun xa'a' va ndo'ó vitin, ne ka'an ndii: “Vitin, uun tiaan ku'un e' iin ñuu, te kundiee e' ikan' iin kuiya, te xiko' e' ña'a, te kanando e' xu'un.” Sakan' kachi ndo'. ¹⁴Ndisu xiní ndo' saa saa a xiin' kivi' ñuu ndo' tiaan. Kuachi ndii, kivi' ñuu e' ndii, nduu' a ndee naa viko' nu'u', ña yoo iin kani', te ndi'i tukuu a so'o. ¹⁵Kuní a ña va'a ka ka'an ndo' ndii: “Naa' kuní xto'o e' ndii, kutiakú e', te saa e' ña yo'o', uun ña jaan'.” Sakan' kuní a ka'an ndo'. ¹⁶Ndisu ndo'ó ndii, ka'an ñuñu' ndo'. Te sakuu' ña ñuñu' naa ña jaan' ndii, ña nia'a nduu' a. ¹⁷Sakan' na kiii' ne xiní saa ña va'a, te xaa' nia a ndii, kuachi xaa' nia nuu' Ndiosí.

Vitin ka'an Santiago xa'a' ña kundo'o ne vika' nia'a

5 ¹Ndo'ó, ne vika' ndii, chuun xa'a' va ndo' ña ka'an i vitin, sakan' ña xa kuyatin' kiii ña kundo'o ndo'. Sakan' na xa'a' ndo' kuaku ndo' te nde'i ndo'. ²Sakan' ña ña vika' ndo' ndii, te'í a, te toto ndo' ndii, xaxi' kuxi a. ³Te oro ndo' xiin' plata ndo' ndii, kuxi a. Te kuxi ña vika' ndo' jaan' kundu ña tijn kuachi ndo'ó nuu' Ndiosí, te kundu a ndee naa nu'u kii' xa'mi' a ña'a. Ndisu taxa'a te taxa'a ka ndo' ña vika' jaan' tee' ndee xa kuyatin' kivi' so'o' ndi'i'. ⁴Kuní so'o ndo' ña ka'an kuachi te tatú ndo' nuu' ndo', te ni nakaya ña savi' ndo', sakan' ña ni cha'vi' ña'a' ndo'. Te xto'o e' Ndiosí ka'nu' koo' chukuu' ndii, xa ni xini so'o a ña ka'an kuachi te jaan'. ⁵Ndo'ó ndii, sii' xika' ndo' iin yivi' yo'o', te sasana' xiin' mii' ndo'. Te sanda'ni ndo' nimá ndo' xiin' sakuu' ña kuní ndo'. Xa'a' a jaan' na ni kuxa'an ndo' ndee naa kiti', ti' xito' kuxi ne yivi', te xa ni xaa kivi' ña kuvi ri'. ⁶Te ni katun' ndo' ne yivi', ne koo' kuachi,

te ni xa'ni' ña'a' ndo' tee' ndee ni kuvi ndoni'i nda'a' nia te naka'an nia xa'a' nia.

Kundieni e' ndee xaa kivi' ña nandiko' xto'o e'

⁷Ñani ta'an' i, kuie kuu ini ndo' ndee xaa kivi' ña nandiko' xto'o e'. Koto ndo' saa kuie kuu' ini te xachuun' xa'a' ku'u ndee nakuixa ña savi'. Te jaan' ndii, kuie kuu' ini ra ndiatu' ra savi' ña kuun nuu' xiin' savi' ña kuun ndi'i ndoso'. ⁸Nii' sakan' tu kuni a ña kuie kuu tu ini ndo'ó, te kuita ni'i ndo' nuu' ichi' Ndiosí ndee xaa kivi' jaan'. Kuachi ndii xa kuyatin' xaa kivi' ña nandiko' xto'o e' jaan'.

⁹Ñani ta'an' i, küchi ta'an' ndo', saa' iin kii' katun' ndo' xa'a' ña jaan'. Sakan' ña xa kuyatin' kui kivi' ña nandiko' ña xa'nú kuachi. ¹⁰Ñani ta'an' i, naka'an' ndo' saa ni kundieni te ni ka'an tiakú tu'un xto'o e' Ndiosí xiin' ña ndiee' a. Te jaan' ndii, kuie ni kuu tu ini ra kii' ni sando'o' ña'a' ne yivi', nii' sakan' tu kuni a kundieni ndo'ó, te kuie kuu tu ini ndo'. ¹¹Ña ndixa nduu' a ndii, ka'an e' ña sañu'u' va Ndiosí ne ni kundieni nuu' tundo'o'. Te ni xini so'o ndo' saa ni kundieni Job nuu' tundo'o', ña kuie ni kuu ini ra. Te xini tu ndo' saa ni sañu'u' va ña'a' xto'o e' Ndiosí so'o' ndi'i, sakan' ña kuvita va ini a xa'a' e', te yoo ka'nu' va tu ini a xa'a' e'.

¹²Ñani ta'an' i, ña ka'nu' ka nduu' a ña tiiin ndiaa ndo' kivi' Ndiosí kii' taxi' ndo' kuento ndo'. Ni ndee tiiin ndiaa tu ndo' ndivi'. Te sakan' tu tiiin ndiaa ndo' ñu'u' iin yivi'. Te tiiin ndiaa ndo' ndee iin nuu' tuku ña'a' kii' taxi' ndo' kuento ndo' jaan'. Süu' jaan' ndii kii' ka'an ndo' "uun" ndii, ña jaan' kuiti' ka'an ndo'. Te kii' ka'an ndo' "ü'un" ndii, ña jaan' kuiti' tu ka'an ndo'. Sakan' saa ndo', saa' iin kii' katun' Ndiosí ndo'ó xa'a' ña jaan'.

Ka'an e' xiin' Ndiosí xa'a' ne kuni kuvi

¹³Naa' yoo sava ndo'ó, ne ndo'o' ndii, na ka'an nia xiin' Ndiosí. Naa' yoo sava ne va'a va kuni tein ndo' ndii, na kata nia yaa Ndiosí. ¹⁴Naa' yoo sava ne kuni kuvi tein ndo' ndii, na kana nia te xixa, te xito' ne nakaya xa'a' Ndiosí, te ka'an ra xiin' a xa'a' nia, te xiin' ña ndiee' xto'o e' kakin ña'a' ra xa'an oliva. ¹⁵Te kii' ini e', te ka'an e' xiin' Ndiosí xa'a' nia ndii, nda'a' ne kuni kuvi jaan' saa xto'o e', te ndoko'o nia. Te naa' ni xaa nia kuachi ndii, koo ka'nu' ini a xa'a' nia. ¹⁶Sakan' na kuii'

na'ma ndo' kuachi ndo' nuu' ta'an' ndo', te ka'an ndo' xiin' Ndiosí xa'a' ta'an' ndo', te nda'a ndo'. Te kii' iin ne xachuun' ndaku nuu' Ndiosí ka'an xiin' a ndii, chindiee' kua'a' ña ka'an ne jaan'. ¹⁷Naa kuu' Elías ndii, iin te yivi' naa yoo' tu ni nduu te jaan'. Te kii' ni ka'an, te ni ka'an ra xiin' Ndiosí ña küün savi' ndii, ni küün xna'a a uni kuiya yoso' sava. ¹⁸Ni ya'a, te ni ka'an tukuu ra xiin' Ndiosí ña küün tukuu savi'. Te ni küün a, te ni yoo ña savi'.

Sañandiko' e' ne yivi' nuu' ña ndixa xa'a' Ndiosí

¹⁹Ñani ta'an' i, naa' iin ndo'ó sanako' xiin' mii' nuu' ña ndixa ña kandixa' e', te sanandiko' inga ne ta'an' e' ndo'ó nuu' ña ndixa jaan' ndii, ²⁰kuní i ña kundani ndo' ña yoo ka sanandiko' ne xaa' kuachi jaan' nuu' ichi' Ndiosí ndii, sakakú ña'a' nia nuu' vi'e ña ndiva'a. Te koo ka'nu' ini Ndiosí xa'a' sakuu' kuachi ne ni xaa kua'a' xava'a kuachi jaan'.